



BARINGKUAS

REBOLUSYONARYO A DYARYO TI UMILI TI CAGAYAN VALLEY

2018


HULYO - SETYEMBRE

P10.00

Editorial

Ibasura ti ubbaw a lokalizado nga tungtungan iti kappia

Ti idurduron ti rehimen US-Duterte a lokalizado a tungtungan iti kappia ket maysa iti kaudian a pammanneknek iti kaawan-sinsinidad daytoy a risuten ti ramut ti armado a labanan. Plano na laeng ditoy ti panagpasurender kadagiti yunit ti New People's Army, imbes a tungtungan nga agpangpanggep a risuten dagiti ramut ti armado a labanan kas dalan tapno magun-od ti nainkalintegang ken pangmabayangan a kappia.



Dandani 50 a tawen ti rebolusyonaryo nga armado a pannakidangadang ti umili a Pilipino manipud irussuat manen daytoy idi 1969. Naitakder manen ti Partido Komunista idi iti bangir ti nagsasaruno a narurungsot a kontra-rebolusyonaryo a gubat dagiti gobyerno iti Pilipinas, iti minamauyong a panangikagumaan daytoy nga iddepen ti apuy ti panagbaringkuas ti umili. Napaay amin dagiti rehimen manipud iti idolo ni Duterte a ni Marcos agingga ita kanyana, gapu ta ti armado a gubat ket nakaramut kadagiti nailian ken demokratiko a tarigagay ti umili. Agpangpanggep daytoy a mawayaan iti ames ti panangidaddadanes ken napalalo a pananggundaway ken panangilupit-lupit dagiti ganggannaet a monopolyo kapitalista ken sangkagemgem a lokal nga agari-ari a dasig.

Agingga a saan a marisrisut dagiti pangkagimongan a problema nga iyan-anak ti sistema a pagbusbussogan laeng dagiti imperyalista, dadakkel a burgesya komprador ken apo't daga, agtultuloy nga agiggem ti armas ken lumaok iti armado a rebolusyon dagiti umili. Daytoy ti kinapudno a saan kayat a bigbigen ken pilot nga ilelemmeng ti gunggong a rehimen.

Panggep ti rehimen a Duterte, kaduana dagiti aso-aso daytoy nga 5th Infantry Division Philippine Army, nga pagtalinaeden ti bulok a sistema ti gimong ta karaman da iti agsagsagrang ken agnumnumar ditoy. Isu nga ti panggep ken ti iyap-appan da a "peace talks" ket mangallilaw, mangpasurender ken mangdis-arma ti New People's Army ken dagiti rebolusyonaryo nga umili. Kayat da a pasukoen babaen ti panangsisirap kadagiti rebolusyonaryo dagiti kari da a babassit a tulong kas ti panangted ti sangkapirgis

LINAON

3 **ARMADO A DANGADANG**

Nagsasaruno nga aksyon militar iti Isabela

5 **AGDAMA A KASASAAD**

Awan-sarday nga operasyon laban iti masa

Pabanglo dagiti pulitiko, pang-ulaw iti tattao
Panagbisita ni Duterte kalpasan ti bagyo

7 **DAMDAMAG**

9 **SALUN-AT**

Danum para iti salun-at (Umuna a paset)

10 **KULTURA**

Daniw
Hamon ng Panahon ni Ka Isko

Maipablaak ti **BARINGKUAS** maminsan kada tallo a bulan. Ipadanon dagiti singasing, dillaw wenno kontribusyon nga artikulo ken damdamag iti kaasitgan a yunit ti BHB, Sangay ti Partido, wenno rebolusyonaryo nga organisasyon masa. I-download ti elektronikong a kopya iti www.philippinerevolutionwebcentral.com.

a daga, bassit a gatad ti kuarta kas premyo dagiti maisuko nga armas ken maited nga impormasyon kontra iti tignayan.

Saan da kayat nga awaten, wenno kayat da nga ilemmeng, a dagiti Nalabaga a mannakigubat ti NPA ken dagiti rebolusyonaryo a puersa ket adda nangato a rebolusyonaryo a kamulatan ken agirusrusuat ti biag-ken-patay a panakidangadang nga awan sabali a tarigagay a magun-od no saan a ti nailian a wayawaya ken pudno a demokrasya. Nakasagana da nga agsakripisyo para iti daytoy, isu nga agiwaywayatda ti gubat ti umili, no pay bigbigigen da ti akmen a kinapateg dagiti tungtungan ti kappia tapno makagun-od kadagiti pagsayaatan ti tignayan.

Ngem gapu ta saan met a napudno, bibiagen manen ti salbahe a ni Duterte ken dagiti heneral na nga utek-pulbura ti datin a naidasar ngem nginilaw ken nalaesen a lokalizado a *peace talks*. Sigurado manen daytoy a mapaay, kapada iti panawen ti rehimen Corazon Aquino, nga immuna a nangidasar kadaytoy kalpasan a ginibusan ti *peace talks* iti nagbaetan ti NDFP ken Gubyerno ti Pilipinas idi 1987, ken inulit iti babaen dagiti rehimen da Estrada ken Macapagal Arroyo.

Ti Comprehensive Local Integration Program ti rehimen ket kapada dagiti immunan a nakaibilangan dagiti adda iti 5th ID ken lokal nga opisyal ti gubyerno nga inaramat da para iti kannigid ken kannawan a panagkurakot. Saan a baro, ngem kinopya met idi pay panawen ni Marcos dagiti pabuya da nga parparbo nga “aduan a panagsurender dagiti kameng ken tagasuporta ti NPA,” saan laeng para pagparangen nga agbalballigi da kano iti pannakilaban iti NPA, ngem ketdi tapno makasikwat ti pondo a dumiretso iti bulsa ti nangangato nga opisyal ti militar ken lokal a gobyerno.

Ngem bistadon a panangallilaw laeng ti kunkuna da a “panagsuko ti rinibu-ribo a kameng ken tagasuporta ti NPA.” Kadagiti baryo iti Cagayan, Isabela, Quirino ken Nueva Viscaya, ammon dagiti mannalon dagiti maipadpadamag a “panagsurender” ket dagidiay pilit-puersado a panagpaayab kadagiti bumaryo tapno mapan kadagiti kampo ti militar. Ken no addan idiy kampoda, sada ideklara a “nagpadalus” kano ti nagan, ken imandar a regular da nga agreport ken sada ida pagawiden.

Ita, naggapu mismo iti ngiwat ti rehimen a Duterte ken ti AFP a saan dan a kayat ti “*peace talks*”. Ti kinaagpayso na, daytoy a taktika ket paset ken naguneg iti kabuklan a todo-gerra ti pasista a rehimen Duterte laban iti umili a Pilipino.

Imanmandato ti Pangrehiyon a Kumand ti New People’s Army iti Cagayan Valley iti amin dagiti nababbaba a kumand ti NPA ken dagiti yunit ti milisya iti babaen daytoy nga agtalmegen iti panangpairteng kadagiti taktikal nga opensiba. Aramiden a mas masansan ken ad-adu dagiti opensiba a makarebbek ti dakkal-platun agingga -iskuad ti AFP ken PNP ken makasamsam ti ad-adu a nangangato a kalibre ti armas. Baaen laeng iti dangadang a magun-od ti kappia a pudno, mapangeddeng nga ibayog ken ingato ti tukad ti rebolusyon nga armado! --**B**

Ilagan ken Echague, Isabela

Nagsasaruno nga aksyon militar ti NPA kontra ti AFP

Iti likudan ti kinapangas ti amo ken dagitoy nga asu-aso ti agari-ari a dasig, saan da met a makaluban ti kinaagpayso. Ta iti bangir ti ibagbaga da nga adun ti simmuko nga NPA ken kunkuna da nga “awanen madlawan da unay nga agkimaw kadagiti saklaw da a teritoryo,” di da met malapdan ti galangugong dagiti putok a maiyab-ablat kadagiti agop-operasyon a yunit ti AFP, PNP ken paramilitar kadagiti tay-ak.


Iti bangir ti nagsasallapid a kinaulbod, saan da met maliklikan dagiti adu a mata ti umili a makakita kadagiti kasualtida kadagiti rinnupak a napasamak. Ti nauneg a suporta ti umili iti armado a pannakidangadang ken ti direkta nga ilalaok da kadaytoy ti kangrunaan a makaigapu ti balligi dagitoy nga atake laban kadagiti asu-aso ti rehimen-US Duterte.

Baro Bukel a Batalyon ti 5ID, Saan a Nakalisi iti Bira ti NPA

Tinambangan ti Reynaldo Pinon Command (RPC)-NPA ti baro a bukela Batalyon ti AFP 5ID PA nga agop-operasyon iti Isabela.

Agosto 16, 2018, alas singko ti bigat idi tinambangan dagiti Nalabaga a mannakigubat ti maysa a platun ti 95th IB iti Barangay Sindon Bayabo, Ilagan City.

Sangapulo ket dua ti dagus a napasag iti AFP ken dua pay kadakuada ti nasugatan. Maysa kadagiti napapatay ni Sgt Junie Iyadan. Nasamsam ti NPA ti maysa nga R4 asolt riple ken 10 a magasin.



Namrayan laengen ti AFP ti nagpatudo iti bala ken nagiten-nag ti bomba manipud ti dua a helikopter nga inaramat da a kas bales ti pannakatambang ti tropa da. Nangibunga daytoy ti nakaro a buteng iti umili nga agindeg iti lugar ken nangdadael ti kabiagan ken sanikua da. Dua ti nuang a natay.

Task Force Kalikasan, Nadisarmaan

Dinisarmaan ti NPA dagiti miembro ti Task Force Kalikasan (TFK) iti Sindon Highway iti isu met laeng a barangay idi Agosto 14, alas 9 ti rabii.

Ti TFK ti mangiyun-una iti panagtarikayo ken manggungundaway kadagiti rekurso ti kabambantayan ti Serra Madre. Dagiti taw-an daytoy ket agkumkumpiskar ti troso tapno ilako ken agganansya manipud ditoy.

Laksid iti dayta, agkikil ti TFK kadagiti matiliw da a babassit nga agtatarikayo iti saan a bumaba ti P2,000 kada byahe, bayat a P10,000 met ti singsingeren da kadagiti agibyaha ti uway.

Kikkikilan ti TFK ti gumat-gatang ti uway ket nayon a kiskissayen iti presyo ti uway nga ilaklako ti umili a kaadduan kadakuada ket minorya nga Agay.

Elemento ti PNP, na-POW ti NPA

Inaresto ti RPC-NPA iti dayta met la nga haywey ni P02 Danilo Maur, maysa nga opisyal ti PNP, bayat nga agibibiyahe isuna ti agarup 3,000 a *boardfeet* ti iligal a troso.

Ni Maur ket maysa nga aktibo nga ahente ti paniktik ti kabusor. Ar-aramaten na a prente ti panagtarikayo ken panaginlalako-lako tapno agespiya kadagiti pagtigtignayan ti NPA.

Maitudtudo met ni Maur nga agkikil kadagiti dadduma pay ang agtartarikayo ken agu-uway. Nakumspiska kanyana ti maysa a kalibre .45.

Naideklara a POW wenna *prisoner of war* ni Maur bayat a naimbestigaran dagiti krimen na iti ili.

Kalpasan ti tallo nga aldaw, nagpaduyakyak ni Maur ti panagbabawi ken boluntaryo a nagkari nga isardeng nan ti panagaramid ti krimen laban iti umili ken iti rebolusyonaryo a tignayan.

Isuna ket nasayaat a naipaima iti pamilya na idi Agosto 19, 2018, alas dos ti malem.

Tropa ti 86IBPA, naisnays ti NPA iti Echague

Setyembre 3, 2018-alas 7:30 ti agsapa, idi nisnays ti maysa a tim ti NPA dagiti madama nga agbriefing nga 86th IBPA iti Barangay Hall ti Mabbayad, Echague, Isabela. Uppat kadagiti militar ti kasualti. Napatay ti CO da a ni Captain Ramos.

Ti 86IBPA ket madama nga agisaysayangkat ti operasyon a PDT iti nasao a tipak dagiti baryo iti dayta nga ili.

54th IBPA, tinambangan ti NPA iti Jones, Isabela

Alas singko ti agsapa ti Agosto 10, 2018 idi binanatan met ti tim ti NPA dagiti magmagna a yunit ti 54th IBPA iti Sitio Dibilasawan, Barangay Diarao, Jones, Isabela. Sangapulo ti dagus a natay ken uppap ti sugatan iti AFP. Maysa kadagiti natay ket ti CO ti nasao a yunit ti kabusor.

Sakbay daytoy, impasa ti masa ti nakita da a kabusor iti yunit ti BHB. Inadal ken binasa dagiti kakadua ti tignay dagiti militar. Apaman a nataya da ti posible a pagnaan a ruta ti kabusor, pimmakat dagiti tropa ti NPA.

Awan naaramidan dagiti nabiaq a kabusor no saan a nagtataray da paadayo iti nagbabakalan. Binunag met ti helikopter dagiti kasualti ti kabusor iti dayta met la nga aldaw.

Tropa ti 95 IBPA natambangan iti Jones, Isabela

Agosto 6, 2018, ala-sais ti agsapa idi nataldiapan ti NPA dagiti magmagna nga oversized platun ti 95th IBPA iti Sitio Puting Bato, Barangay Diwagwag, Jones, Isabela. Dagus nga ingkagumaan ti NPA nga inarudokan a nalimed ti nasao a yunit ti AFP. Pimmuesto da iti paborable a lugar tapno tambangan da ida.

Apaman a nakabatug ti target da a biraen nga iskwad ti

AFP, pinutukan da ida. Nakasamsam ti kakadua ti maysa a riple ti M16. Natay ti uppap a kabusor ken nasugatan ti tallo pay. Saan a nakabales ti AFP bayat a natalged a nakaatras ti NPA.

53rd DRC ti AFP, hinaras ti NPA iti Jones

Agosto 4, 2018, 7:45 ti bigat idi hinaras met ti maysa a yunit ti NPA dagiti soldado ti 53rd DRC a mangkubkob koma ti nagpanawan a puesto ti NPA sadiay Barangay Dibulod, Jones, Isabela.

Tallo ti dagus a napasag iti benneg ti AFP. Rabii da nga inruar dagiti kasualti da tapno ilemmeng manen daytoy iti imatang ti umili ken midya.

NPA pumigpigs

Narabaw ken agtatapaw ti pannakaawat unay ti rehimen ken dagiti buyot na nga AFP ti puon ken gapu ti kaadda ti rebolusyonaryo a tignayan. Wenna agararapaap da a siririing idi kunaen da a gibusan iti uneg daytoy a tawen ti dandani lima dekadang a pannakigubat laban kadagiti rehimen a mangitantandudo ti interes dagiti agari-ari a dasig ken ti amo da a ganggannaet nga imperialista.

Awan sabali a turongen ti minamaag a panggep ti rehimen no saan nga agturong iti pannakapaay. Aniaman a gubat a saan a nainkalinteg, kontra-umili ken mangitagtag-ay ti interes dagiti agari-ari a dasig ket pasig a maigarangugong iti nauneg a derraas ti pannakaabak. --**B**

Pabanglo kadagiti pulitiko, pang-ulaw ti tattao

Kalpasan ti bagyo nga Kompong itay Nobyembre, bimmisita ni Presidente Duterte iti Cagayan Valley tapno ipakita ti “pannakipagrikna” na kan pay met kadagiti biktima ti naames a bagyo. Adu manen a kari ti inibbatan na kadagiti umili nga arig na’t droga a mangbartek ti apagkanito tapno iliwag ti dagensen a mapadpadasan da. Saan a pangkabayagan a risut ti indiaya na iti umili, no di ket apagapaman laeng a mailabas ti bisin ti masa iti relip nga impaay na. Palalo met nga inusar a pabanglo dagiti agngayangay a politiko iti idadateng ti eleksyon 2019 daytoy nga aktibidad.

Ginundawayan met dagiti lokal nga opisyal ti gubyrno daytoy a kalamidad. Kalpasan nga indeklara a nakalamidad ti dua a probinsya ti Isabela ken Cagayan, kas da la uwak nga umariwawa ti ragsak dagitoy nga opisyal ta gundaway da manen a maka-ibulsa ti dak-dakkel a kuarta manipud iti “calamity fund” para iti bukod da nga interes, iti nagan dagiti biktima ti bagyo. Alimatek iti takdang!

Saanmeta pinalabes ti presidente a

dinagas ti kampo ti 5th ID iti Gamu, Isabela. Kasta unay met nga impannakel ti asu-aso na nga AFP ti agarup sangagasut a napilit da nga inurnong nga surenderi manipud iti nadumaduma a saklaw iti operasyon da. Dayoy ti impasarabo da kenni Duterte.

Daytoy ti impakita a pammanek- nek ti balligi da kano a nangpakapsut iti CPP-NPA. Naragsakan met ti amo da iti perpormans nga impakita ti nasao a dibisyon. Sinaludoan, pinadayawan ken inyebkas daytoy ti panagyaman iti tropa a timmungpal kadagiti mandato na.


Awan-sarday nga operasyon laban iti masa

Saan nga inataatan ti AFP/PNP, iti panangiyuna ti 5ID, nga Sinoperasyon ti Abagatan agingga iti Tengnga nga Isabela manipud Hunyo agingga Setyembre 2018. Awit da latta ti reaksyunaryo a galad a manglimlimo, mangbutbuteng, manangdadael, mananakaw ken, kangrunaan na, kinaranggas iti sanikua ken biag ti masa. Nagtitipon dagiti tropa ti 861B, 951B, 541B, 84th IB, 503rd reconnaissance coy, PNP-RPSB ken dagiti suporta a yunit ti CAA iti saklaw da.

Iti Laud a Cagayan-Apayao, saan a sinardengan ti nagkombina a tropa ti 171B, Marine Bn, PNP-RPSB, Reconnaissance Coy ti 502nd bde ken dagiti paramilitar-CAFGU sipud pay maudi a bulan ti tawen 2017 agingga ti Setyembre 2018. Adda man baet na, lawas laeng.

Kalpasan ti dakkel nga operasyon, implastar da ti dagiti Peace and Development Teams kadagiti tipak ti baryo nga atapen da nga ayan dagiti organisado ken aktibo nga umili nga agisaysayangkat kadagiti pagsayaatan ti lumugar, panangilaban iti lehitimo nga interes ken karbengan da. Kayat da a buraken ti urnos ken panagkaykaysa dagiti tattao.

Iti panagrairada kadagiti barbaryo wenno tipak dagiti baryo, pasig a pammutbuteng, panangallilaw ken panagpasurrender ti aramid da. Kalpasan na, ideklara da nga NPA dagiti lider ken masa. Saan laeng a dayta, agpatayab da ti saywar tapno mangpatanur ti intriga iti intar dagiti bumaryo tapno isuda ti agririri. Agitakder ti paniktik ken agrekluta iti CAFGU. Agipasaknap ti anti-sosyal nga aramid kas ti sugal, bartek, droga, panagbabae, ken dadduma pay a kaasping dagitoy. Buraken da ti urnos ken panagkaykaysa ti umili. **-B**



Ngem iti likudan daytoy, agsisimparat ti pammadakes ti rehimen US-Duterte ken AFP laban iti CPP-NPA ken tuloy-tuloy a panagisaknap ti nakaro a buteng iti intar ti umili, nangruna dagiti lumablaba para iti pudno a reporma iti daga, makatao a karbengan ken panagbiag. Kagiddan daytoy a kinarungsot, baybaywen met isuna ti nakaro a krisis iti ekonomya. Iti tay-ak ti pulitika, sige ti rigodon. Tunggal partido ket agkonkonsolida kadagiti patarayan da iti 2019 nga eleksyon. Ken iti intar ti militar, tumataud ti banggaan iti intar dagiti nangangato nga opisyal gapu iti kanya-kanya nga interes ken panagkurakot. Isu a kasla tekka a kumkumpet iti AFP ni Duterte tapno makapagtalinaed iti panagari.

Agsasallapiden ti kinaulbod nga ibagbaga da laban iti CPP-NPA. Kanayon da nga iwarwara-gawag a bassit laengen ti NPA. Sa kalpasan na, kuna na manen nga ginasut-gasut ti sumuksuko nga NPA. Nagggapuan na ngarud dayta a ginasut-gasut? Ken 3,800 laengen ti kabuklan a bilang ti puersa ti NPA, sananto kunaen nga 7,000 ti bilang ti simmuko! Palalo a talaga ti laing da nga agkuenta!

Saan a nakasursuro ti rehimen nga US-Duterte ken dagiti pasurotna nga AFP kadagiti naglabasen a rehimen a nangiwayat ti kontra-umili a gubat ken pasig a nagmurdong iti pannakapaay. Saan na a malapdan ti panagabante ti rebolusyonaryo a tignayan gapu ta daytoy ti pudno a maka-umili ken para iti pudno a demokrasya ken wayawaya. **-B**

DAMDAMAG

Field Testing ti Golden Rice iti Isabelala, sinupring dagiti mannalon ken syentista

Nagtitipon iti Gamu, Isabelala idi Setiembre 22 ti nadumaduma nga organisasyon ti mannalon iti Isabelala ken syentista manipud iti Magsasaka at Syentipiko para sa Pag-unlad ng agrikultura (MASIPAG) tapno kumontra iti pangta ti field testing iti 200 ektarya ti kontrobersyal a bin-i nga Golden Rice iti Isabelala.

Iti porum iti St. Michael's Cathedral Hall a napauloan ti "Gintong Palay, Tansong Pangako", inlawlawag ti pangta iti salun-at ken kabiagan ti umili no agtuloy ti panagmula ken panagilako ti Golden Rice.

Segun iti MASIPAG, NGO ken syentista, ti Golden Rice ket maysa a Genetically Modified (GM) a produkto a pinadur-as ti International Rice Research Institute, Phil Rice, ken ti ganggannaet a korporasyon kas ti Sygenta. Plano kan pay idi dagitoy a risuten ti kakurangan iti Vitamin A nangruna dagiti ubbing ken kababaihan.

Segun kenni Chris Panerio, National Coordinator ti MASIPAG, ti Golden Rice ket agpampamarang a tumulong iti panagdur-as dagiti babassit a mannalon ken maysa a "makatao a proyekto". Daytoy ket kapada ti tokar ti Green Revolution ken MASAGANA 99 idi panawen ni Ferdinand Marcos nga pinagganansyaan ti ganggannaet a korporasyon iti agrikultura. Ar-aramaten laeng ti Sygenta ken Monsanto (nga ita ket ChemChina ken Baysanto) ti "humanitarian project" tapno mangallilaw ken manglimlimo a makatao.

Kuna pay ni Panerio, "mapangallilaw daytoy ta iti umuna a 5 tawen ket libre amin nga farm inputs nga iwarasda, ngem kalpasan manen daytoy ket agsingir dan. Pagbalinen da a nakadepende iti abono ken pestisidyo ti daga tapno dakdakkal ton ti mailako da iti mannalon a kaipapanan met ti dakdakkal ti malikkab da a ganansya. Panakailumlom iti utang ti mannalon ti turongen na."

Laksid pay iti dayta, mangibunga pay daytoy ti *genetic erosion* wenno pannakapukaw ti lokal a klase ti pagay nga imulmula dagiti

mannalon a maus-usaran ti organiko nga abono, pestisidio ken kasigudan a kabaelan iti panagtalon. Panggep da a kontrolen ti bin-i ken monopolisaen daytoy ti dadakkel nga agribisnes kas ti Sygenta, kakutsabos ti IRRI ken Phil Rice.

Iti datos ti MASIPAG ket mapatta-patta nga 113.28 bilyon dolyares ti ganansya manipud iti GMO ti dadakkel a ganggannaet a kompanya ket ti 10% daytoy wenno 11.3 bilyon dolyares ket manipud iti GM a pagay.

Nayon met ni Nita Aprecio ti DAGAMI, Tumauni, Isabela, “Makadadael iti salun-at ti mannalon ti kastoy a klase ti bin-i. Pangta met daytoy iti karbengan ti mannalon iti daga a suksukayen gapu ta iti agdama ket mailumlom da iti utang iti HYV a pagay ken GM a mais, isu a maag-agawan kami ti daga dagiti treyder ken usurero.”



Nagpaduyakyak met ti suporta iti mannalon iti kampanya kontra-Golden Rice ken panagsagana tapno itignay daytoy a laban dagiti tao ti simbaan, NGO, ken dadduma pay nga organisasyon.

Ex-NPA a Kimmappon iti AFP, Pinatay ti PNP

Pinatay ti PNP idi Hunyo 12, 2018 ni Cheriflor “Boy” dela Cruz, traydor iti rebolusyonaryo a tignayan, bayat nga aw-awaten na ti kuarta manipud iti kinikilan na a negosyante iti Santiago, Isabela.

Dagus a binigbig ti kabit daytoy nga isu ket aktibo nga elemento ti yunit ti 86th IB PA. Ngem idi alaen ti midya ti makuna ti AFP kanaig iti daytoy ket nagulimek da.

Ni dela Cruz, alyas Jao, ket dati nga NPA a natiliw iti maysa a labanan sadiay Mabbayad, Echague, Isabela iti 2005. Nakipagkompromiso iti kabusor, simmuko kagiddan ti panagbaliktad na. Insuro na dagiti ammo na a nakadulin nga armas ti tignayan. Nagitudo kadagiti masa ken alyado nga ammo na nga aktibo nga agtigitignay ken sumupsuporta iti rebolusyonaryo a tignayan. Nagbalin a paniktik ti AFP.

Supapak ti panagbalin na a paspasurot, inagsep ti AFP ni dela Cruz bilang elemento da. Nagbalin nga aktibo nga elemento iti 86th IB ken paniktik iti saklaw daytoy nga erya. Laksid ditoy, maysa ni dela Cruz kadagiti grupo dagiti ar-aramaten ti AFP a tagakikil wenno ekstortionista kadagiti dadakkel a negosyante, ken uray pay dagiti dadakkel nga apo’t daga ken politiko, usar ti nagan ti NPA.

Ti pannakapapatay ni dela Cruz ket mangpampaneknek nga ti pudno nga utek dagiti ekstorsyon a maar-aramid iti rehiyon ti Cagayan Valley ket mismo nga AFP. Ti kastoy nga ar-aramiden ti AFP ket desperado nga addang da tapno dadaelen ti NPA. Ar-aramaten dagitoy nga impostor ti nagan ti nadumaduma a Komand ti NPA. Nalawag unay a paset daytoy ti makinarya iti uneg mismo ti AFP tapno agtakaw ti kuarta ken mangparnuay ti dakes nga imahe iti rebolusyonaryo a tignayan.

Kasumbangir na, naipakita ti kaawan kaes-eskan na a biag ni dela Cruz. Ti saan a panangbigbig ti AFP a tao da ket pakakitaan nga isarwa dan kalpasan a mapakinabangan dagiti traydor iti tignayan. Isu nga daytoy a pagteng ket agserbi a pagpanunotan dagiti amin a kas kenni dela Cruz a pinili na a pagserbian dagiti agari-ari a dasig ngem iti bukod na a dasig. Saan tayo a tuladen.

Bise Gobernador Tony Pet Albano, Kakutsabos ti 5th ID

Iti maysa nga interbyu kenni Bise Gobernador Tony Pet Albano itay umuna a lawas ti Hulyo 2018, naduktalan a maysa gayam daytoy a pannakangiawat ti militar idi ibaga na a kayat met ti LGU Isabela a sumukon ti NPA. Di na kayat ti “*peace talks*” nga agpangpanggep a gun-oden ti pangmabayagan a kappia a nakabasar iti hustisya, no di ket itantandudo na ti panangpasuko kadagiti rebolusyonaryo a puersa iti panggep a pagtalinaeden ti sistema a mananggundaway ken manangidadanes a makinkinabang met ti pamilya Albano ken dagiti kakutsabos da.

Kuna ni Albano, no sumuko kanon ti NPA ket ad-adda a dumur-as ti Isabela. Nga kasla dimmur-asen daytoy iti panawen a dandani siam a tawen nga kaadda da nga agkabsat iti poder (Rodito ken Tony Pet) kas bise gobernador ken ni Bojie Dy kas gobernador.

Iti kinaagpayso na, awan maipagpanakkel a mayor a proyekto ti LGU-Isabela iti naglabas a walo a tawen, malaksid iti maysa a kalsada agturong iti *coastal town* ti probinsya a nai-report a pinaglikkaban ti ganansya dagiti mangidadaulo nga opisyal ti probinsya a pakaibilangan ni Albano; ken ti kadakkelan nga ar-aramiden ket agpasukib kadagiti mayor ken kapitan ti baryo tapno siguraduen ti kinapudno da kadakuada, agmaniobra tapno gumanansya kadagiti negosyo ken porsiento manipud kadagiti proyekto. Ipuesto dagiti kabagyan ken gagayem iti gubyerno, kannigid-kannawan a kurakot nga ammon ken umaw-aweng a pagtutungtongan dagiti umili. Mano metten a dekada a nakatugaw iti poder kadagiti ili ken distrito ti pamilya ti Albano, ngem awan pakinabang kadakuada dagiti taga-Isabela no saan laeng a maregmeg da!

Kuna pay ti bise gobernador a mangnamnama isuna nga no sumuko ti NPA ket maisardeng ti “*ekstorsyon*,” panagsingir ti “*campaign fees*” iti eleksyon ken dadduma pay a kontra-rebolusyonaryo a panagkita a saan a bumigbigbig ken manglalais iti iraraira ti rebolusyonaryo a gubyerno ti umili iti nalawa a paset ti kaaw-awayan. Nabayag metten a naipalgak ti agkabsat a Rodito ken Tony Pet a napeklan da a kontra-mannalon. Awan ti ammo da no saan a sumuporta kadagiti programa para laeng kadagiti aggamgamrud ti daga ken mananggundaway a komprador ken imperialista. Naipuesto da iti poder saan a gapu iti nasayaat a rekord ti panangisakit da iti masa, no di ket gapu ti dinastiya a sistema iti pulitika ken dagiti eleksyon a nailuto babaen ti panagkusit ken kuarta.

Laglagipen tayo ti rumbeng a mapili iti panawen ti panagbobotos. **-B**

SALUN-AT

Dagiti dadduma pay nga usar ti danum iti panangagas

(Umuna a paset)



Sakbay ti agas a mainum, padasem pay laeng ti danum!

Napateg ti danum iti panagpatalinaed ti kinasalun-at. Ngem napatpateg manen daytoy no adda dagiti sagubanit tayo. Ammoen dagiti pamuspusan no kasano a maaramat ti danum tapno makissayan ti sakit ken agsubli ti kinasalun-at.

No adda sakit nga adda kakuyog na a panaggurigor

No napalalo a napudot ti temperatura ti bagi ti tao, adda gurigor na. Ngem saan a daytoy ti sakit na, no di ket pagilasinan laeng ti sakit. Adu a sakit nga addaan sintomas ti gurigor. No nangato unay a gurigor ket napeggad, nangruna kadagiti babassit nga ubbing.

Napateg la unay nga uminum ti adu a danum ti pasyente nga aggurgurigor. Tumulong daytoy iti panagpababa ti bara. Kagiddan na, uksoben ti lupot ken labaran ti intero a bagi. Pamagaan ti tunggal paset ti bagi kalpasan a

punasan ti nabasa a labakara daytoy.

Mabalin pay nga ikkan ti labakara a naibasa iti nalamiis a danum ti barukong na ken muing. Basaen manen daytoy no mamagaanen.

Saan a balkoten ti adu a lupot ken ules. Bay-an nga adda sadiwa nga angin a makastrek iti ayan ti pasyente. Saan nga iserra dagiti tawa ken ruangan.

No saan unay nga umisbo wenno nakaro a duyaw ti isbo, nayunan pay ti in-inumen a danum.

No nangato unayen ti gurigor, mabalin nga agkom-bulsyon ti tao. Mabalin a maad-daan ti permanente a dadael iti utek kas ti paralisis, wenno maaddaan ti kissiw

(epilepsy) wenno bumuntog ti panagpanunot.

Iti kastoy a kasasaad, laksid kadagiti addang a nadakamat iti ngato, mabalin a suyatan ti pasyente iti nalamiis a danum, wenno ilublob isuna iti nalamiis a danum.


Mabalin a painumen ti agas a kas ti paracetamol. Ti dosis ti paracetamol nga 300mg a tablet:

- No natataeng iti 12 a tawen: dua a tableta kada 4 nga oras

- No agtawen 6 agingga 12: maysa a tablet kada 4 nga oras

- No ub-ubing: apagkapat a tableta kada 4 nga oras.

No saan a makatilmon ti tableta ti pasyente, rumeken ti tableta agingga a mapolbos. Wenno ikanaw iti danum sa ipagna iti ubet na a kasla labatiba wenno aramaten ti ringgilya nga awan dagom na. Takuaten no ania ti sakit a makaigapu ti gurigor. No bumayag pay a saan a mapababa ti gurigor, ipanen isuna iti ospital.



No adda rugit wenno iritasyon iti mata

Napeggad iti mata no maikkan daytoy ti asido kas ti baterya, gasolina wenno pestisidyo. Pagtalinaeden a nakalukat ti mata ken madagdagus nga ugasan daytoy ti nadalus a nalamiis a danum. Ituloy-tuloy daytoy iti uneg ti 30 a minutos wenno agingga a mapukaw ti panaas wenno sakit. Alwadan a saan nga mapan iti

bangir a mata ti daytoy a danum, gapu ta awit daytoy ti kemikal a naggapu iti apektado a mata.

No marigatan a tumakki

Ti masansan a makaigapu ditoy ket ti kinakurang ti makmakan a nateng, prutas ken dagiti taraon nga adda payber na. Wenno saan, awan ehersisyo ken saan unay aggargaraw ti pasyente.

Uminom ti adu a danum. Mangan ti nateng ken prutas, ken dagiti taraon a kas iti kamoteng kahoy, kamote, karots, singkamas, pasas, bukel ti pakwan wenno karabasa. Makatulong la unay ti pannangan ti marunggay ken papaya. Maymayat daytoy ngem iti uminom dagiti agas a maaw-awagan a laxative wenno pangpurga. **-B**

KULTURA

HAMON NG PANAON Ka Isko

Isang mainit na pagbati mga kasama
Ako'y nagagalak at kayo'y nakapunta
Dito sa pulungan na walang kasing saya
At nawa'y magustuhan itong aking ipresenta.

Tayo'y humaharap sa malaking pagsubok
Na nagbibigay sa interes sa sariling nagmumukmok
Sa gitna ng kagipitan na sa ati'y tumutusok
Ito pa rin tayo at di nalulugmok.

Sa ating pakikibaka'y walang katapusan
Partido namumuno ng walang kakulangan
Sama-samang gumagampan ng gawain sa larangan
At humaharap sa masang salat sa kamulatan

Armadong mamamayan ngayon na'y mag-aalsa
Sa lipunang ginagalawan na wala namang napapala
Mga salot sa lipunan, kayo nama'y bababa
Sa sistema't lipunan na sa inyo'y nagpakasasa.

Sosyalismo'y makakamta't di lang palaisipan
Ngayon na'y pag-ibayuhin sa daang tungo kinabukasan
At sa tamang panahon ang buong kapuluan
Magliliyab, dadagundong ang puot ng mamamayang nagbabalikwas!

